

**Uunga siunnersuut: Ilinniartitaanernut Inuussutissarsiutinullu siunnersuisarneq pillugu Inatsisartut inatsisaannik allanngiueq pillugu Inatsisartut inatsisissaattut siunnersuut nr. xx, xx. xxx 2018-imeersoq**

(Ilinniartitaanernut, Kultureqarnermut, Ilageeqarnermut Nunanullu Allanut Naalakkersuisoq)

**Saqqummiussinermi allakkiaq**

**Siullermeerinnineq**

Siunnersuut isigineqassaaq tunuliaqutaqartunik paasineqartunik inatsisitigut tunngavissanik amigaataasunik siunnersuisarnermut inatsimmi, tarnikkut atukkanut aamma isumaginninnikkut ilinniagaqartunik siunnersuisarnermut tunngatillugu, Nuna Tamakkerlugu Iltersuisarfimmit ingerlanneqartartut eqqarsaatigalugit.

Inatsisartut inatsisaata ilinniartitaanernut inuussutissarsiutinullu siunnersuisarneq pillugu atortuulersinneqarneranut atatillugu taamani Naalakkersuisuusut pilersippaat Nuna Tamakkerlugu Iltersuisarfik, Inatsisartut inatsisaanni § 6 naapertorlugu.

Qitiusumik ingerlatsiviup suliassai aallaqqaammut tassaagaluarpit siunnersuisarnermik suliniutinik nalilersuisarneq ineriartortitsinerlu, siunnersuisarneq iltersuisarnerlu pillugit suliniutaasunik paasissutissiisarneq, iltersuisarnermi atortussanik suliaqartarneq siaruarterisarnerlu, iltersuisartunik ilinniartitsisarneq ingerlaqqiffiusumillu ilinniagaqartitsisarneq, siunnersuisarneq najukkani qitiusumik ingerlatsivinnut sammisumik, kiisalu misilittakkanik ilisimasanillu avitseqatigiittarneq attaveqaasersornernilu tapersersuisarnerit.

Kisiannili sulisuusut aamma atugassiissutaasut allat ilinniakkaminnik taamaatitsiinnartartunik akiuiniarnermi atorneqartuusut taamani Inatsisartut inatsisaata atortuulerneratigut kommuniniit qitiusumik ingerlatsivimmuut nuunneqarput. Taamani siunnerfiusoq tassaavoq qitiusumik ingerlatsiviup sularissagai ilinniagaqarnermut attuumassuteqartut unammilligassat, assersuutigalugu naammassisaqarsinnaanermi ajornartorsiutaasartut, soraarummeernissamut qussalasarneq allatigullu ernummateqalersarneq ilinniagaqarnermut atatillugu. Suliassalli annertussusaat suussusaallu piartuaartunik allanngoriartorsimapput, ilinniagaqartut pineqartut amerlasuut namminneq inuttut ajornartorsiutigisagaannik tunngaveqartunik, taamalu assersuutigalugu qussalasarneq, isumatsassimalersarneq kiisalu aamma kinguaassiuutitigut kanngunarsagaasarnerit assigisaallu ilinniagaqartuni atugaasartut pissutigalugit. Ullumikkut qitiusumik ingerlatsiviup isumagisaraa nuna tamakkerlugu tarnikkut inuttullu atukkatigut siunnersuisarneq, tamatumani aamma aappariinnik

peqqissaasarneq, ilinniagaqartunut aammalu innuttaasunut allanut Majoriami ingerlatsisuusartunut tunngatillugu.

Tamatuma saniatigut inassuteqartartunut siunnersuisarnermi inatsimmi § 7, imm. 3 naapertorlugu siunnersuisoqatigiit katitigaanerannut inassuteqaateqartartunut nakorsaaneq peqqinnissamik nakkutilliisuusoq ilanngunneqarpoq. Taamaaliortoqarpoq qularnaarumallugu pisortat tarnip pissusaanut isumaginninnermullu tunngasutigut siunnersuisarnermik suliaqartartut, tamatumani aamma katsorsaaneranut tunngasunik ilisimasaqarnerup sinniisoqarnissaat. Aalajangersakkamilu tassanittaaq KANUKOKA-p atorunnaarnera inissinneqarpoq, kommunit inassuteqartarneranni kommunit ataatsimoorlutik inassuteqartussaanerannik taarserneqarluni. Kiisalu aamma kukkunersiuilluni inatsimmik atuuttumik atuaaqinnermi pissutissaqarsimavoq inatsisip kalaallisuuani aalajangersakkat oqaasertaannik allannguinnissaq.

Taamatut oqaaseqarluta siunnersuut Inatsisartut inussiarnersumik suliarinninnissaannut ingerlateqqippara.